



240-4514

了翁上座諸本荅及有
家書暨武州紫雲山
我微城西院直中永
為學者不敢許出院內
當山三世越半紀謹於



3 64853

妙法蓮華經通義卷第五

姚秦三藏法師鳩摩羅什奉

詔譯

明南嶽沙門憨山釋德清述

妙法蓮華經安樂行品第十四

初心得記之衆雖遵佛勅且懼婆娑人多弊
惡不敢橫牙皆直願往他方弘宣而藥王樂
說敬順佛意誓以忍力持之此雖能行然強
力恐詬乎初心所能亦非持人之計故文始

9 80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8

地當

微故爲後

法華通義

多寶如來於

哉宿王

爲良

故獨以

法華通義

宿王華汝

滿林香

特爲啓請末世持經之方。以教悟守之法。故佛爲說四安樂行意。謂惡世諸難自我所招。苟自有以處之。則自然遠離諸難而不以爲患。四行具足乃得悟守之力。方盡持經之妙。故說髻珠之喻。以顯第一之功。故此品來也。惟此四行品節。向以行處近處深心大悲心四法釋之。義雖有當。臨文未便會通。舊解以正身正語正意大悲心四法節文甚明。故今從之。然此四法以性戒爲主。亦若楞嚴由攝。

心爲戒而入也。

爾時文殊師利法王子菩薩摩訶薩白佛言。世尊是諸菩薩甚爲難有。敬順佛故。發大誓願於後惡世。護持讀說是法華經。世尊菩薩摩訶薩於後惡世云何能說是經。

此文殊因上藥主樂說等諸菩薩敬順佛意。發願於後世持經。故特爲新學菩薩請問持經之法。欲令此等各具遠害之方。不畏弊惡。難事也。

佛告文殊師利若菩薩摩訶薩於後惡世欲說是經當安住四法

北世尊因文殊請遂說四安樂行以此弘經
可以遠諸患難也。四行者正身正語正意大
悲然菩薩涉俗利生無過自利利他二行而
已。三業端正自利之實也。大悲一行利他之
功也。若三業不正來難之端也。無慈愍心則
致害之由也。安可以涉俗乎。此如來善訓守
護家業之嘉範也。二行以智爲先導故文殊

特請

一者安住菩薩行處親近處能爲衆生演說是
經文殊師利云何名菩薩摩訶薩行處若菩薩
摩訶薩住忍辱地柔和善順而不卒暴心亦不
驚又復於法無所行而觀諸法如實相亦不行
不分別是名菩薩摩訶薩行處

來座者諸法空是。蓋言親近隨順之至也。今此四法廣釋前義。但行處近處有理事二行。然必以忍辱爲第一。所謂著如來衣也。故行處首言住忍辱地者。究竟寂滅之地也。忍有生忍無生忍寂滅忍。生忍者。謂強力忍詬。而未能忘我。我不忘。安能消彼暴戾哉。無生忍者。謂橫逆之來。但觀心本不生。雖彼以惡加之。而自心不生。不爲所動。然不動雖安。未能忘物。故戒勿親近。以防惡覺惡習。乃爲善入。

無生也。寂滅忍者。謂觀自他身心。本自寂滅。寂滅則心境雙忘了。無對待。全不見有毀辱之相。故能柔和善順而不卒暴。心亦不驚。是所謂忍辱地。乃入如來室也。以彼已寂滅。則無毀者亦無受者。忍相亦無。故曰又復於法無所行。若有所行。則彼我未忘。非寂滅地矣。所以不見有所行者。以觀法如實相。謂當體寂滅。本自如如。故不見有可行之忍。亦不分別所忍之辱。此平等不二。能所兩忘。忍行處。

滅所謂法空爲座理行之妙也是爲行處云何名菩薩摩訶薩親近處菩薩摩訶薩不親近國王王子大臣官長不親近諸外道梵志尼犍子等及造世俗文筆讚詠外書及路伽耶陀逆路伽耶陀者亦不親近諸有兒戲相杖相撲及那羅等種種變現之戲又不親近旃陀羅及畜猪羊鷄狗畋獵漁捕諸惡律儀如是人等或時來者則爲說法無所希望又不親近求聲聞比丘比丘尼優婆塞優婆夷亦不問訊若於房

中若經行處若在講堂中不共住止或時來
隨宜說法無所希求文殊師利又菩薩摩訶薩
不應於女人身取能生欲想相而爲說法亦不
樂見若入他家不與小女處女寡女等共語亦
復不近五種不男之人以爲親厚不獨入他家
若有因緣須獨入時但一心念佛若爲女人說
法不露齒笑不現脣臆乃至爲法猶不親厚況
復餘事不樂畜年少弟子沙彌小兒亦不樂與
同師常好坐禪在於閒處修攝其心文殊師利

是名初親近處

此言初親近處以戒定爲本也。專戒不親不可親之人。恐引惡習多妨正行。卽楞嚴由三漸次入無生忍之意也。不親近國王等防染富貴驕恣之習所以妨正念也。不親諸外道樂防邪見之習妨正見也。梵志出家邪見之人尼犍子在家邪見之人言不親世俗文筆等乃妄言綺語雜論妨正思惟也。言路伽耶陀者師破弟子之惡論逆路伽耶陀弟子破師

之惡論不親謂妨正知見也。言不親兇險相拟相撲等者謂防顛倒散亂之習也。那羅延此云力旃陀羅此云嚴幟謂以惡自嚴如標幟此妨寂靜行也。猪羊等惡律儀防殺盜之習也來者則爲說法以消惡念所謂大慈悲心也不親求聲聞等者防小乘狹劣之習也楞伽經云應捨外道小乘惡見議論當親近最勝知識言不問訊至不共住止者防漸染之習也來時則爲說法化彼狹習令入大

道所謂入如來室也不親女人等者防淫習也不近不男之人言非法器防猥婬邪僻之習也不獨入他家防譏嫌邪染恐失正念也爲女人說法不露齒笑乃至爲法猶不親厚防引婬機破壞戒心也不畜年少弟子等者恐妨安樂行也觀此近處卽根本戒品所謂執身不行執心不起其三千威儀八萬細行通不出此楞嚴經云因戒生定因定發慧常好坐禪則定依戒立也是名初親近處猶屬

事行

復次菩薩摩訶薩觀一切法空如實相不顛倒不動不退不轉如虛空無所有性一切語言道斷不生不出不起無名無相實無所有無量無邊無礙無障但以因緣有從顛倒生故說常樂觀如是法相是名菩薩摩訶薩第二親近處律儀深防染習執心不起乃無生忍此觀一此第二近處以觀照爲體前戒不親近諸惡切法空乃寂滅忍正所謂諸法空爲座也謂

觀一切諸法當體空寂稱真實相了無一法可得不見有顛倒動轉生滅動亂之相也。以觀諸法本自寂靜故不生不滅了無動轉當體如如故心境如空本無所有若心境寂滅則一切寂滅故言語道斷。如是則無毀我者亦無受者以絕對待故無生出起滅之相故曰無名無相一切皆無則心言路絕故無量無邊無礙無障也以觀諸法雖寂而非斷滅故但以因緣假合而有一切皆從顛倒妄想

而生故有言說耳此乃安心寂滅之境所謂住忍辱地故曰常樂觀如是法相是名第二親近處惡世持經妙行無出此矣雖云正身其實三業寂靜總該萬行涉俗利生無尚此矣

爾時世尊欲重宣此義而說偈言
若有菩薩於後惡世無怖畏心欲說是經應入行處及親近處常離國王及國王子大臣官長兒險戲者及旃陀羅外道梵志亦不親近增上

慢人貪著小乘三藏學者破戒比丘名字羅漢及比丘尼好戲笑者深著五欲求現滅度諸優婆夷皆勿親近若是人等以好心來到菩薩所爲聞佛道菩薩則以無所畏心不懷希望而爲說法寡女處女及諸不男皆勿親近以爲親厚亦莫親近屠兒魁膾畋獵漁捕爲利殺害販肉自活街賣女色如是之人皆勿親近兇險相撲種種嬉戲諸淫女等盡勿親近莫獨屏處爲女說法若說法時無得戲笑入里乞食將一比丘

若無比丘一心念佛是則名爲行處近處以此二處能安樂說

若有菩薩下至能安樂說六十句通頌行處近處也初六句總標常離國王下六句頌不近國王兇戲惡律儀外道四事亦不親近下二十句頌不近求小乘等寡女下四句頌不近婦女不男等亦莫親近下十二句頌不近殺盜婬三事莫獨下八句頌不爲女人說法乞食將一比丘所謂上座阿闍黎防誤失也

阿難無此故誤墮耳。一心念佛所謂心清淨
也是則下四句總結二處事行。

又復不行上中下法有爲無爲實不實法亦不
分別是男是女不得諸法不知不見是則名爲
菩薩行處一切諸法空無所有無有常住亦無
起滅是名智者所親近處顛倒分別諸法有無
是實非實是生非生在於閒處修攝其心安住
不動如須彌山觀一切法皆無所有猶如虛空
無有堅固不生不出不動不退常住一相是名

近處若有比丘於我滅後入是行處及親近處
說斯經時無有怯弱菩薩有時入於靜室以正
憶念隨義觀法從禪定起爲諸國王王子臣民
婆羅門等開化演暢說斯經典其心安隱無有
怯弱文殊師利是名菩薩安住初心能於後世
說法華經

又復不行下三十二句通頌二處理行初十
句頌於法無所行等謂其心寂止不起分別
也言不得諸法謂無一法可當情故若不知

不見也。此頌行處理行。一切諸法下二十二句。頌近處理行空無所有等頌觀一切法空無所有如實相等。以心言路絕故其心安住不動也。觀一切下頌觀一切法如虛空義以諸法如空故常住一相。若有比丘下六句結頌二處。釋上能安樂說。以心無怯弱故安樂耳。菩薩有時下十二句頌無怯弱之所以謂菩薩時入禪定隨義觀法。言如理觀察得諸法正性以從定起說經所以心安無怯也。文

殊師利下五句結頌正身行也

又文殊師利如來滅後於末法中欲說是經應住安樂行若口宣說若讀經時不樂說人及經典過亦不輕慢諸餘法師不說他人好惡長短於聲聞人亦不稱名說其過惡亦不稱名讚歎其美又亦不生怨嫌之心善修如是安樂心故諸有聽者不逆其意有所難問不以小乘法答但以大乘而爲解說令得一切種智讀宣說者此正語行也。應住安樂行者卽上二處。如理

1 2 3 4 5 6 7 8 9 10

1 2 3 4 5 6 7 8 9 10

1 2 3 4 5 6 7 8 9

觀察無分別心。然後稱理而說。故無口過也。
不說經典過以達諸法實相。乃佛隨宜所說。
故不言其法有過。過者謂偏空跋驥智慧等。
也。不慢餘師以無人我相故不言人之過也。
於聲聞人不稱名說過以如理而觀。不見他
人有過失也不稱名讚歎恐不見稱者。卻恨
也。不生怨嫌之心。以不見有毀我者也。諸有
文問者但以大乘法答令得種智此大慈悲心
也。如此可謂善修安樂行矣。

爾時世尊欲重宣此義而說偈言

菩薩常樂安隱說法於清淨地而施床座以油
塗身澡浴塵穢著清淨衣內外俱淨安處法座
隨問爲說若有比丘及比丘尼諸優婆塞及優
婆夷國王王子群臣士民以微妙義和顏爲說
若有難問隨義而答因緣譬喻敷演分別以是
方便皆使發心漸漸增益入於佛道除懶惰意
及懈怠想離諸憂惱慈心說法晝夜常說無上
道教以諸因緣無量譬喻開示衆生成令歡喜

法華通義 卷五

100

100

衣服卧具飲食醫藥而於其中無所希望但一心念說法因緣願成佛道令衆亦爾是則大利安樂供養我滅度後若有比丘能演說斯妙法華經心無嫉恚諸惱障礙亦無憂愁及罵詈者又無怖畏加刀杖等亦無擯出安住忍故智者如是善修其心能住安樂如我上說其人功德千萬億劫算數譬喻說不能盡

此頌正語行也。菩薩常樂下三十六句通頌正語行初十句安隱說法言內外俱淨也。安

隱內淨其心也淨地油塗澡浴淨衣外淨也。香油塗身乃蘇合油西城以此塗身取其香而潔也。安處法座所謂法空爲座則內外俱空矣隨問爲說言不逆其意也。若有比丘下二十六句頌說法之儀式也。四衆國王等求法之人也。以微妙義謂但說大乘實相之法也和顏則樂說隨義而答應機而說也皆使發心等謂大慈悲也。除懶惰懈怠則勇猛精進以法自娛故離諸憂惱晝夜常說則精進

之至。咸令歡喜。所謂示教利喜也。衣服臥具。下十句。頌清淨說法。不希利養也。願成佛道。則以法爲供。所謂諸供養中。法供養最。謂以法爲樂。則自受安樂。供養故無外慕耳。我滅度後。下十二句。頌廣前品。忍行。以心主於忍。故口無語過。所以能遠諸害也。蓋言諸難。肯從自心不忍而致。以安住於忍。所謂兵無所容其刃。以無死地。故一切皆無矣。智者如是。下八句。結頌正語行也。謂菩薩善修其心。能

住安樂則自無諸難。法利益廣。受化益多。故功德無窮。說不能盡也。

又文殊師利菩薩。摩訶薩於後末世。法欲滅時。受持讀誦斯經典者。無懷嫉妒。譖詆之心。亦勿輕罵學佛道者。求其長短。若比丘比丘尼。優婆塞。優婆夷。求聲聞者。求辟支佛者。求菩薩道者。無得惱之。令其疑惑。語其人言。汝等去道甚遠。終不能得一切種智。所以者何。汝是放逸之人。於道懈怠。故又亦不應戲論諸法。有所諍競。當

於一切衆生起大悲想於諸如來起慈父想於
 諸菩薩起大師想於十方諸大菩薩常應深心
 恭敬禮拜於一切衆生平等說法以順法故不
 多不少乃至深愛法者亦不爲多說文殊師利
 是菩薩摩訶薩於後末世法欲滅時有成就是
 第三安樂行者說是法時無能惱亂得好同學
 共讀誦是經亦得大衆而得聽受聽已能持持
 已能誦誦已能說說已能書若使人書供養經
 卷恭敬尊重讚歎

此正意行也意根諸惡煩惱二毒爲最嫉妒
 嘴也誦媚於上誑惑於衆貪與癡也輕罵學
 佛道者求其長短恐其勝已三毒發業也以
 末法惡世三毒熾盛之時持經之人本爲化
 彼強暴爾乃自以三毒逆之所謂以火益火
 名曰溢多安可以爲善故戒持經自淨其心
 與法相應也若比丘等謂四衆有求三乘之
 道者母矜已爲大乘學者而惱亂彼人令其
 疑悔返失本行也當以慈悲調伏攝化漸進

可也。語其人言下惱亂之語也。既不能調攝而以逆言加之譏其所學去道甚遠不得種智。又責其放逸此言是而心非。故觸動彼心多生誹謗是自致之也。戲論諸法謂分別大小乘法空有偏圓。致起諍競。是皆發於三毒意根未淨所以不能住安樂行也。當於一切衆生下正教持經之法當以慈悲爲首也。衆生迷倒悲愍之心如一子地當想如來之慈如父之等愛一子則無厭倦之心矣。菩薩乃

善學佛行專於利生之人。當如師保之想以法其行。故於十方菩薩常應深心恭敬禮拜也。於一切衆生下教以持經調攝之行也。平等說法則不以貴賤智愚高下其心。謂以平等大悲而說也。順法謂離四謗。以有是增益謗無是損減謗亦無亦有相違謗。非有非無戲論謗以稱法性而說則離此諸過故云。不多不少深愛法者不爲多說。如慈母之養嬰兒。不多與兒酥恐食不消返生毒也。末世持

經能住此行則無能惱亂之人所謂善修其心也如此則得朋同學得衆來聽使法利漸廣六種之功德自備此實持經之妙行也有人如此訕不樂從其化豈有怨害之事哉是所謂真安樂行矣

爾時世尊欲重宣此義而說偈言
 若欲說是經當捨嫉恚慢諂誑邪偽心常修質直行不輕蔑於人亦不戲論法不令他疑悔云汝不得佛是佛子說法常柔和能忍慈悲於一

切不生懈怠心十方大菩薩愍衆故行道應生恭敬心是則我大師於諸佛世尊生無上父想破於憍慢心說法無障礙第三法如是智者應守護一心安樂行無量衆所敬

此若欲下四句頌初節質直行謂直心正念真如法故則意根三毒等煩惱自捨矣不輕蔑下四句頌第二節輕蔑耿忽之義正長行譏其去道甚遠謂輕忽之也是佛子下十二句頌第三節然通以忍爲主也故曰常柔和

能忍想佛如父敬菩薩如師所以破自己憍慢之心故說法自無障礙耳第三法下結頌又文殊師利菩薩摩訶薩於後末世法欲滅時有持是法華經者於在家出家人中生大慈心於非菩薩人中生大悲心應作是念如是之人則爲大失如來方便隨宜說法不聞不知不覺不問不信不解其人雖不問不信不解是經我得阿耨多羅三藐三菩提時隨在何地以神通力智慧力引之令得住是法中文殊師利是菩

薩摩訶薩於如來滅後有成就此第四法者說是法時無有過失

此大慈悲行也前三行卽著如來衣坐如來座此一行所謂入如來室也前法師品但敎菩薩法略舉要行今此品則廣釋前義耳然慈能與樂悲能拔苦在家出家有能信受此法者則增益其法樂故生大慈心非菩薩乃不信闡提之人當愍其愚迷而調伏誘引令生正信以拔其苦故生大悲心應作是念下

出其悲愍之意。於不信之人愍其大失。所以失者於如來隨宜所說之妙法。一向不聞故不知不覺。且執愚自是。故不問以不聞故不信不解。彼既顛愚如此。我終不棄。當成佛時隨在何地。必欲以神通智慧引之令得住是法中。使其正因不失。終有成佛之分。此大慈悲之至也。末世持經。具如是四行說法。乃能離諸過失。以妙契佛心。所謂行如來事也。常爲比丘比丘尼優婆塞優婆夷國王王子太

臣人民婆羅門居士等供養恭敬尊重讚歎虛空諸天爲聽法故。亦常隨侍若在聚落城邑空閒林中。有人來欲難問者。諸天晝夜常爲法故而衛護之能令聽者皆得歡喜。所以者何。此經是一切過去未來現在諸佛神力所護故。文殊師利是法華。經於無量國中乃至名字不可得聞。何況得見受持讀誦。

此通結四行之勝益也。言持經之人具此四行。則爲四衆國王等之所供養尊重讚歎。況

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

有毀謗之辱乎。虛空諸天常隨守護。豈有魔
撓之事乎。若處無人之境。儻有生心難問者。
以諸天衛護神力使聽者歡喜。安有惱害所
加乎。前云我遣諸天龍神常爲守護。以此經
一切三世諸佛神力所護。是知諸天晝夜常
而守者乃如來所遣也。以行契佛行故。諸佛護
聞念如此也。以此妙法華經無量國中名字尚
不得聞。何況得見受持讀誦。以法之難遇故
持經者固當慎重。是諸佛之慧命。人天之眼。

目故不得不護念。若不聞不信。豈非大失耶。
文殊師利譬如強力轉輪聖王欲以威勢降伏
諸國。而諸小王不順其命時。轉輪王起種種兵
而往討伐。王見兵衆戰有功者。卽大歡喜。隨功
賞賜。或與田宅。聚落城邑。或與衣服嚴身之具。
或與種種珍寶金銀琉璃磚碣碼碯珊瑚琥珀。
象馬車乘奴婢人民。唯髻中明珠。不以與之所
以者。何獨王頂上有此一珠。若以與之。王諸眷
屬必大驚怪。

此設輪王髻珠之喻以況此經不妄與人也。佛王三界稱曰大雄以能破諸有故強力輪王威伏諸國譬力破諸有也。小王不順命譬五陰煩惱生死諸魔背覺合塵不順覺性也。如來出世爲一大事特爲攝伏諸魔故現身說法始從鹿苑說有破凡夫執生死之苦次說般若談空破二乘厭有之見次說深密和空會空有破二乘之偏執次說楞伽直指識藏卽如來藏頓見佛性破二乘之權行是則四

十年中所說諸經以無量無數種種方便以破三乘之執情故云起種種兵而往討伐討謂聲其罪伐謂破其國乃彈呵二乘破涅槃城也然三乘聞法各有所證故譬兵衆有功論功賞賜也田地以至奴婢人民等皆三乘果位功德利用之事也獨王髻中明珠不與譬不卽爲說此法華經也所以不說者恐衆驚疑故不輕說如髻珠不敢輕賜也四眾中文殊師利如來亦復如是以禪定智慧力得法

國土王於三界而諸魔王不肯順伏如來賢聖
 諸將與之共戰其有功者心亦歡喜於四衆中
 爲說諸經令其心悅賜以禪定解脫無漏根力
 諸法之財又復賜與涅槃之城言得滅度引導
 其心令皆歡喜而不爲說是法華經文殊師利
 如轉輪王見諸兵衆有大功者心甚歡喜以此
 難信之珠久在髻中不妄與人而今與之如來
 亦復如是於三界中爲大法王以法教化一切
 衆生見賢聖軍與五陰魔煩惱魔死魔共戰有

大功勲滅三毒出三界破魔網爾時如來亦大
 歡喜此法華經能令衆生至一切智一切世間
 多怨難信先所未說而今說之文殊師利此法
 华經是諸如來第一之說於諸說中最爲甚深
 未後賜與如彼強力之王久護明珠今乃與之
 文殊師利此法華經諸佛如來秘密之藏於諸
 經中最在其上長夜守護不妄宣說始於今日
 乃與汝等而敷演之

此法合也如來亦復如是合首節其有功者

下合次節如轉輪王下重牒其喻明獨髻珠
不與如來亦復如是下重合次節明諸經皆
說獨不說法華者以難信故先所未說而今
說之是爲希有難信之法如輪王解髻珠以
賜非上功者不能居也故云此經是諸如來
第一之說故末後乃與正如髻珠以待大功
也此法華經諸佛如來秘密之藏結顯佛於
生死長夜守護四十餘年以待機也

爾時世尊欲重宣此義而說偈言

常行忍辱哀愍一切乃能演說佛所讚經後末
世時持此經者於家出家及非菩薩應生慈悲
斯等不聞不信是經則爲大失我得佛道以諸
方便爲說此法令住其中譬如強力轉輪之王
兵戰有功賞賜諸物象馬車乘嚴身之具及諸
田宅聚落城邑或與衣服種種珍寶奴婢財物
歡喜賜與如有勇健能爲難事王解髻中明珠
賜之如來亦爾爲諸法王忍辱大力智慧寶藏
以大慈悲如法化世見一切人受諸苦惱欲求

解脫與諸魔戰爲是衆生說種種法以大方便說此諸經既知衆生得其力已未後乃爲說是法華如王解髻明珠與之此經爲尊衆經中上我常守護不妄開示今正是時爲汝等說我滅度後求佛道者欲得安隱演說斯經應當親近如是四法讀是經者常無憂惱又無病痛顏色鮮白不生貧窮卑賤醜陋衆生樂見如慕賢聖天諸童子以爲給使刀杖不加毒不能害若人惡罵口則閉塞遊行無畏如師子王智慧光明

如日之照

此常行忍辱下四句通頌忍行爲本後末世下十二句頌慈悲行令住其中謂令安住寂滅法中也譬如強力下十六句頌譬喻如來亦爾下二十句頌法合法王以忍辱大力而說法故持經妙行必以忍辱爲最勝也此經爲尊下六句頌此經尊上我滅度後下六句頌結答問意讀是經者下十四句頌持經者能離障遠害也遊行無畏下四句頌持經之

10 1 2 3 4 5 6 7 8 9

10 1 2 3 4 5 6 7 8 9

10 1 2 3 4 5 6 7 8 9

人無畏光明者以心與法一故正大無畏若

此也

若於夢中但見妙事見諸如來坐師子座諸比丘衆圍繞說法又見龍神阿脩羅等數如恒沙恭敬合掌自見其身而爲說法又見諸佛身相金色放無量光照於一切以梵音聲演說諸法佛爲四衆說無上法見身處中合掌讚佛聞法歡喜而爲供養得陀羅尼證不退智佛知其心深入佛道卽爲授記成最正覺汝善男子當於

來世得無量智佛之大道國土嚴淨廣大無比亦有四衆合掌聽法又見自身在山林中修習善法證諸實相深入禪定見十方佛

諸佛身金色百福相莊嚴聞法爲人說常有是好夢又夢作國王捨宮殿眷屬及上妙五欲行詣於道場在菩提樹下而處師子座求道過七日得諸佛之智成無上道已起而轉法輪爲四衆說法經千萬億劫說無漏妙法度無量衆生後當入涅槃如煙盡燈滅

此頌持經之勝益也。若於夢中常見妙事者。以持經之人心與理冥習消垢淨如水清月現故妙境現前此勝益之應也。見諸如來等十六句頌夢中妙事見佛爲衆說法。又見龍神聽自說法。又見佛放光說法。佛爲四衆下十二句。又見佛說法。自身處會聞法得總持證不退具足因行。佛知其心故爲授記。汝善男子下八句言授記之事。又見自身下十句言得記之後見自身在山修行證實相得禪。

定定中又見佛金色莊嚴之身。見已從佛聞法轉爲人說。又夢作國王下十六句言夢作國王捨其國位。往詣道場求道七日遂得佛智成無上道。乃至說法千萬億劫度諸衆生化緣既畢當入涅槃。此一夢之中始終見佛聞法悟道蒙佛授記。及授記後又夢見捨國位求菩提乃至一生成佛終至入於涅槃。且經千萬億劫之久而歷歷事皆如前白毫光中所現諸佛始終一大事因緣者蓋未曾開

佛知見則佛以光相示其成佛始終不離現前一念。令其了然明見。今聞妙法。既已開佛知見。因持經之益。則自見成佛始終。卽億劫長久。只在當人一念不離刹那際。令其自信不疑也。然此約夢說。所謂生死涅槃。猶如昨夢。意令持經之人。四行成就。當觀諸法。如夢中事。空無所有。了不可得。此深證實相三昧者之勝益也。奇哉奇哉。夢中見佛。聞法悟道。又夢入定。定中說法利人。乃至捨位求道。至

成佛度生及入涅槃經無量劫之久。是雖夢事豈常情可測識哉。華嚴古今一際延促同時具見於此。以三百餘言敘無盡之事。非佛妙辯何能若此。

妙法蓮華經從地涌出品第十五

盡持經之妙行也。由前得記聲聞雖願持經
自力不充難入生死險道要假他力所以佛
令菩薩調護於心有所未安今從他方來有
八恒河沙數菩薩各願守護持此經者世尊
止而不許者何也以從外來故宗門所謂從
門入者不是家珍向自己會中流出方始益
天蓋地故云我自有六萬恒河沙衆從地涌
出體用雙彰故眷屬同等以此性德持經方
能妙契法身故詣虛空向三世尊至此則生

滅見謝延促同時故五十小劫謂如半日以
此稱性成行故四上首皆以行名意顯如此
持經方稱如來本懷蓋由安樂四行成就所
致也以性德現前殊非心識分別可知故彌
勒與八千恒河沙衆皆生疑心乃云不識一
人故與諸佛侍者同時請問也此非小緣故
先勉以被精進鎧發堅固意乃可信受而如
來自言今欲顯發宣示諸佛智慧自在神通
之力師子奮迅之力威猛大勢之力諸佛本

懷盡在於此。豈細事哉。然世尊告以此諸大衆皆是如來成道已來初令發心所教化者故彌勒大衆皆起疑心。以眼見世尊成道四十年來所教化者盡在靈山一會。而此地涌之衆音所未見也。且我等向蒙佛教今尚如此劣解。而此大衆皆久植德本深種善根者何以少時化此多衆。故說父少子老之喻以述疑情。此從從地湧出以顯迹妙。如來壽量特顯本妙。以祛二乘執跡之見。以明法身常。

住不屬生滅。故此品連壽量次第而來也。爾時他方國土諸來菩薩摩訶薩過八恒河沙數於大衆中起合掌作禮而白佛言。世尊若聽我等於佛滅後在此娑婆世界勤加精進護持讀誦書寫供養是經典者當於此土而廣說之。爾時佛告諸菩薩摩訶薩衆止善男子不須汝等護持此經所以者何。我娑婆世界自有六萬恒河沙等菩薩摩訶薩一一菩薩各有六萬恒河沙眷屬是諸人等能於我滅後護持讀誦廣

說此經。

此他方菩薩願在娑婆持此經典。佛止而不許者。佛意欲持此經須在性德自足不假於外。將顯本迹微妙以彰法身常住。不屬生滅去來也。故云不須汝等我自有六萬恒河沙等卷屬護持廣說此經也。菩薩之數皆以六萬言者。意表六識成智則恒沙性德當下現前。所謂自性宗通妙用無極。若寄他六識則落名言分別。非持經之妙。故他不足恃也。

佛說是時娑婆世界三千大千國土地皆振裂而於其中有無量千萬億菩薩摩訶薩同時涌出是諸菩薩身皆金色三十二相無量光明先盡在此娑婆世界之下此界虛空中住是諸菩薩聞釋迦牟尼佛所說音聲從下發來

此應佛所言自有六萬恒沙之衆同時從地涌現其前也。言三千國土地皆振裂而涌出者。謂地本一真法界。向以無明感結故性德隱而不顯。今佛法音一至則頓破無明而自

性全彰妙悟自心故恒沙性德總在心源妙用無邊如是則可持經非他分別名言者比故不須他方者此也。菩薩皆具佛相者以德用無二也。以是本覺妙明心體故身皆金色無量光明也。世界依法性空故在此世界下方虛空中住也。以始覺有功本覺乃顯故聞出佛音聲從下發來意顯音聞爲教體也。

一一菩薩皆是大衆唱導之首各將六萬恒河沙眷屬況將五萬四萬三萬二萬一萬恒河沙

等眷屬者況復乃至一恒河沙半恒河沙四分之一乃至千萬億那由他分之一況復千萬億那由他眷屬況復億萬眷屬況復千萬百萬乃至一萬況復一千一百乃至一十況復將五四三二一弟子者況復單已樂遠離行如是等比無量無邊筭數譬喻所不能知

此言諸來菩薩各將眷屬多寡之不一也。謂所將者有齊沙數漸少至妓數有妓數漸少至單已而單已無眷屬者又過恒沙數之多。

意顯數量無窮且伴主之不同體用之不等

也

是諸菩薩從地出已各詣虛空七寶妙塔多寶如來釋迦牟尼佛所到已向二世尊頭面禮足及至諸寶樹下師子座上佛所亦皆作禮右繞三匝合掌恭敬以諸菩薩種種讚法而以讚歎住在一而欣樂瞻仰於二世尊是諸菩薩摩訶薩從初涌出以諸菩薩種種讚法而讚於佛如是時間經五十小劫是時釋迦牟尼佛默然而

坐及諸四衆亦皆默然五十小劫佛神力故令諸大衆謂如半日爾時四衆亦以佛神力故見諸菩薩偏滿無量百千萬億國土虛空

此言涌出之衆見佛之儀也言各詣虛空向二世尊者謂入法界空妙契法身也種種讚法而讚於佛如是時間經五十小劫大衆謂如半日者言深證實相入法界性則延促同時大經云一念普觀無量劫無去無來亦無住所謂十世古今始終不離當念了無延促

之相也。四衆以佛神力見諸菩薩徧滿虛空者。所謂無邊刹境。自他不隔於毫端。以法界性空無作妙力。非三乘可見。故假佛神力乃見也。

是菩薩衆中有四導師 一名上行二名無邊行
三名淨行四名安立行是四菩薩於其衆中最
爲上首唱導之師在大衆前各共合掌觀釋迦
牟尼佛而問訊言世尊少病少惱安樂行不所
應度者受教房不不令世尊生疲勞耶爾時四

大菩薩而說偈言

世尊安樂少病少惱教化衆生得無疲倦又諸衆生受化易不不令世尊生疲勞耶

此言來衆上首問訊世尊者親近隨順覺性之象持經以妙行爲首故皆名行也。問訊之辭言病惱疲勞者以見釋尊示現與民同患且徵婆婆弊惡難可教化也。

爾時世尊於菩薩大衆中而作是言如是如是諸善男子如來安樂少病少惱諸衆生等易可

法華經疏
卷五
化度無有疲勞所以者何是諸衆生世世已來常受我化亦於過去諸佛恭敬尊重種諸善根此諸衆生始見我身聞我所說卽皆信受入如來慧除先修學小乘者如是之人我今亦令得聞是經入於佛慧

此如來答衆問訊之辭正顯本之妙也言此衆生世世受化則法緣已熟供養多佛則集福已厚此證大通往昔之緣因故今一見佛大聞法卽入佛慧是指上根利智之菩薩也除

先修習小乘者今因聞此經亦令人佛慧是知佛化衆生端在有緣凡今不信弊惡之人未下緣種故今重在持經爲結將來之緣所以如來汲汲求人然所求之人須是妙契佛心深體佛行乃能忍可奈緣所以難得其人耳

爾時諸大菩薩而說偈言
善哉善哉大雄世尊諸衆生等易可化度能問諸佛甚深智慧聞已信行我等隨喜

法華經疏

卷五

於時世尊讚歎上首諸大菩薩善哉善哉善男子汝等能於如來發隨喜心

此來衆聞說化衆多度故亦各發心故云我等隨喜世尊讚衆有隨喜心善其法有託也爾時彌勒菩薩及八千恒河沙諸菩薩衆皆作是念我等從昔已來不見不聞如是大菩薩摩訶薩衆從地涌出住世尊前合掌供養問訊如來時彌勒菩薩摩訶薩知八千恒河沙諸菩薩等心之所念并欲自決所疑合掌向佛以偈問

日文三四卷
此彌勒因衆騰疑致問來衆之因緣也言八千生疑者顯入識未破之象也謂此性德妙用殊非識心分別可知故皆生疑故云不見不聞也彌勒乃唯識宗師知衆心念故爲衆請決所疑以偈問也無量千萬億大衆諸菩薩昔所未曾見願兩足尊說是從何所來以何因緣集此問大衆來集之因緣也

巨身大神通智慧叵思議其志念堅固有大忍辱力衆生所樂見爲從何所來

此見來衆表裏異常不知從何所來也

一諸菩薩所將諸眷屬其數無有量如恒河沙等或有大菩薩將六萬恒沙如是諸大衆一心求佛道是諸大師等六萬恒河沙俱來供養佛及護持是經將五萬恒沙其數過於是四萬及三萬二萬至一萬一千一百等乃至一恒沙半及三四分億萬分之一千萬那由他萬億諸

弟子乃至於半億其數復過上百萬至一萬一千及一百五十與一十乃至三二一單已無眷屬樂於獨處者俱來至佛所其數轉過上

此問來衆主伴多少不一也將六萬恒沙至億萬分之一乃敘所將之伴將少者反過於將多者也先約沙數而問千萬那由他此約妓數而問由將妓數以至單已漸少者反多於將多者譯文最巧思之乃見但觀結句其取數過上則挨次而下漸多於上也

法華通義

卷五

如是諸大衆若人行籌數過於恒沙劫猶不能盡知是諸大威德精進菩薩衆誰爲其說法教化而成就從誰初發心稱揚何佛法受持行誰經修習何佛道

此詳問來衆誰所教化也以從地涌出則非常所見且在下方空中而住又非可見故生疑惑也以見此多衆威儀智慧各各殊勝意非一千佛一時所化故詳問誰爲說法教化從誰發心稱何法持何經修習何佛道乃能如是

之挺特也卽此數問發起壽量之說也

如是諸菩薩神通大智力四方地振裂皆從中涌出世尊我昔來未曾見是事願說其所從國土之名號我常遊諸國未曾見是衆我於此衆中乃不識一人忽然從地出願說其因緣今此之大會無量百千億是諸菩薩等皆欲知此事是諸菩薩衆本末之因緣無量德世尊惟願決衆疑

此問雖見從地涌出而竟不知從何乃自地

法華經疏

卷五

下而來也。故問所從來國土之名。古德云渠無國土何處逢渠。故云所遊諸國未曾見是衆也。今此大衆欲知此衆之因緣。故願世尊央疑也。

爾時釋迦牟尼分身諸佛從無量千萬億他方國土來者在於八方諸寶樹下師子座上結跏趺坐其佛侍者各各見是菩薩大衆於三千大千世界四方從地涌出住於虛空各自其佛言世尊此諸無量無邊阿僧祇菩薩大衆從何所得聞

來爾時諸佛各告侍者諸善男子且待須臾有菩薩摩訶菩名曰彌勒釋迦牟尼佛之所授記次後作佛已問斯事佛今答之汝等自當因是得聞

此隨分身佛之弟子各自本佛亦疑而問也爾時釋迦牟尼佛告彌勒菩薩善哉善哉阿逸多乃能問佛如是大事汝等當共一心被精進鎧發堅固意如來今欲顯發宣示諸佛智慧諸佛自在神通之力諸佛師子奮迅之力諸佛威

猛大勢之力

法華通義

卷五

此釋尊許答先勉衆精進者以其事之難信也。彌勒號阿逸多云無能勝大事者謂諸佛智慧神通奮迅威猛及顯化地涌多衆之因緣皆大事也。今將宣示非精進者不能領故勉之也。諸佛智慧前云甚深無量但略拈示之耳。一往開示卽今言至久遠成佛教化多衆及下壽量等事皆廣顯佛智甚深無量也。諸佛自在神通之力者如前三變淨土接衆

今在空以指開塔及後云古至梵天聲歎彈指聲震大千等皆自在神通之力也。諸佛師子皆奮迅之力者師子凡奮迅作舞不遺餘力。如一音普說分身齊集說壽量之本皆直示法身全體無有利法故如師子奮迅也。諸佛威猛大勢之力者謂化地涌之多衆拔三乘之堅壘降五陰煩惱之衆魔皆威猛大勢之力也。此四句佛自述本具之能事推之諸佛顯道同也。佛之全體大用一向秘而未發今因

地涌之衆方談壽量功德等事是皆難信故
勉其被精進鑑可信受而不驚疑也。告彌勒
補處者欲爲當來法式故也。

爾時世尊欲重宣此義而說偈言

當精進一心我欲說此事勿得有疑悔佛智叵
思議汝今出信力住於恐善中昔所未聞法今
皆當得聞我今安慰汝勿得懷疑懼佛無不實
語智慧不可量所得第一法甚深叵分別如是
今當說汝等一心聽

此頌許說勉聽也此事乃智慧神通等四事
以非尋常故難信易疑四事總屬佛之智慧
故云佛智叵思議若信無力則信不及矣恐
善中謂住無生忍中乃可信而不疑也今所
說者是佛智慧不可思量第一甚深不可分
別之法而今說之故再三安慰勿疑勉其信
力善聽也

爾時世尊說此偈已告彌勒菩薩我今於此大
衆宣告汝等阿逸多是諸大菩薩摩訶薩無量

10 1 2 3 4 5 6 7 8 9 90

100

9

無數阿僧祇從地涌出汝等昔所未見者我於是娑婆世界得阿耨多羅三藐三菩提已教化示導是諸菩薩調伏其心令發道意此諸菩薩皆於是娑婆世界之下此界虛空中住於諸經典讀誦通利思惟分別正憶念阿逸多是諸善男子等不樂在衆多有所說常樂靜處勤行精進未曾休息亦不依止人天而住常樂深智無有障礙亦常樂於諸佛之法一心精進求無上慧

此佛答彌勒所問也言此地涌之衆皆是我於娑婆世界成佛已來之所教化此答誰爲說法教化成就從誰發心也此界虛空中住言不離當下答所從來國也於諸經典讀誦通利正憶念者答受持行誰經言諸經皆通不止一經謂一切法皆是佛法也不樂在衆等者答修習何佛道言皆從止觀而入佛慧也常樂靜處亦不依止人天而住修習止也古德云我不從人天來論云修習止者不依

形色身心世界等。一切皆離故也。常樂深智等修習觀也。觀照分明則法法實相。意謂一切菩薩凡求佛道未有不由止觀而入者。下方空中正示止觀之象。顯非止觀不足以破恒沙住地煩惱。卽從地涌出者此也。

爾時世尊欲重宣此義而說偈言

阿逸汝當知是諸大菩薩從無數劫來修習佛智慧悉是我所化今發大道心此等是我子依止是世界常行頭陀事志樂於靜處捨大衆憒久遠來教化是等衆

此頗答意也。首六句頗答誰爲教化從誰發心。此等是我子下八句頗答受持誰經修習

何道。此言止也。晝夜常精進下六句頌答所從來國亦言觀也。以爲求佛道故。住空中勤求智慧。故說種種妙法。言已入佛慧心。無所畏言。二嚴已具。此二句頌其德也。我於伽耶城下八句頌本末因緣。伽耶成道言雖近跡教化成道意指遠因。故彌勒從此起疑。說父少子老之喻。以發起壽量之談。以顯本也。我今說實語下四句結答問意。旣云令初發心。又言久遠教化以成佛事。近而又言遠是事。

難信。故以實語叮嚀。意在勿疑必信。此必有由也。故大衆生疑。

爾時彌勒菩薩摩訶薩及無數諸菩薩等心生
疑惑怪未曾有而作是念云何世尊於少時間
教化如是無量無邊阿僧祇諸大菩薩令住阿
耨多羅三藐三菩提卽白佛言世尊如來爲太
子時出於釋宮去伽耶城不遠坐於道場得成
阿耨多羅三藐三菩提從是已來始過四十餘
年世尊云何於此少時大作佛事以佛勢力以

佛功德教化如是無量大菩薩衆當成阿耨多羅三藐三菩提世尊此大菩薩衆假使有人於千萬億劫數不能盡不得其邊斯等久遠已求於無量無邊諸佛所植諸善根成就菩薩道常修梵行世尊如此之事世所難信

此言衆生疑也意謂世尊成道未久如何教化如是多衆各各令住菩提此跡近而指遠故可疑也但衆作念而彌勒言請謂見如來爲太子時出家成道至今方四十餘年其時

甚少此執近跡也云何少時而化多衆當成菩提其指甚遠固可疑也況此諸菩薩皆久植德本非少時之可成就此事世所難信也譬如有人色美髮黑年二十五指百歲人言是我子其百歲人亦指年少言是我父生育我等是事難信

此設喻以況少時不能教化多衆之疑也年二十五言甚少百歲言甚老少喻釋尊老喻地涌多衆相違之甚故舉世所疑

10 1 2 3 4 5 6 7 8 9 90

100

佛亦如是得道已來其實未久而此大衆諸菩薩等已於無量千萬億劫爲佛道故勤行精進善入出住無量百千萬億三昧得大神通久修梵行善能次第習諸善法巧於問答人中之寶一切世間甚爲希有今日世尊方云得佛道時初令發心教化示道令向阿耨多羅三藐三菩提世尊得佛未久乃能作此大功德事

此法合也得道未久合父少而此大衆至甚爲希有合子老今日世尊作此大功德事合

相違言此菩薩善入出住無量三昧且此大衆未見作爲而彌勒乃言其各得三昧如此妙用自在者又非不知也故下自言信佛所說

我等雖復信佛隨宜所說佛所出言未曾虛妄佛所知者皆悉通達然諸新發意菩薩於佛滅後若聞是語或不信受而起破法罪業因緣唯然世尊願爲解說除我等疑及未來世諸善男子聞此事已亦不生疑

此爲後世請決疑也。彌勒自陳從佛旣久。信
佛所說。然佛所知者皆悉通達。則無所不知。
而信知此事。決無疑矣。但恐新學菩薩智淺。
心麤。及佛滅後。聞而不信。則取破法之罪。故
願佛說破。所以懇請。若如來不以壽量答之。
則長夜之疑難決矣。故地涌之衆實發壽量
之本也。

爾時彌勒菩薩欲重宣此義。而說偈言。

佛昔從釋種出家。近伽耶坐於菩提樹爾來尚

未久。此諸佛子等其數不可量。久已行佛道。住
於神通力善學菩薩道。不染世間法。如蓮華在
水從地而涌出。皆起恭敬心。住於世尊前。是事
難思議。云何而可信。佛得道甚近。所成就甚多。
願爲除衆疑。如實分別說。譬如少壯人年始二
十五。示人百歲子。髮白而面皺。是等我所生子
亦說是。父少而子老。舉世所不信。世尊亦如
是。得道來甚近。是諸菩薩等志固無怯弱。從無
量劫來而行菩薩道。巧於難問。答其心無所畏。

別說不樂在人衆常好在禪定爲求佛道故於
下空中住我等從佛聞於此事無疑願佛爲未
來演說令開解若有於此經生疑不信者卽當
墮惡道願今爲解說是無量菩薩云何於少時
教化令發心而住不退地

此頌敘疑也。佛昔從釋種至如實分別說二
十句。叙執近疑久故此起問。如蓮華在水讚
地涌之德也。譬如少壯八下八句。頌設喻世

尊亦如是下十六句頌衆老成之德我等從
佛聞下十二句頌爲後世啓請決疑也。

此品來意由前地漏之衆彌勒騰疑。故世尊說自壽量以顯本跡之妙。竭盡本懷以破二乘生滅之見。以顯法身常住。隨緣普應隱顯無礙。以明如來智慧甚深無量方便利生。其智慧門難解難入之意也。然諸修行人不透法身終非真悟。絲毫情念未忘。盡屬衆生知

100 1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

見非佛知見也。前寶塔品遠假多寶如來。寂啓法身境界。而諸大眾雖信多寶不信釋迦。同是一身一智慧力。以諸聲聞昔所見者。但知鹿苑說法之佛以爲真佛。更不知有向上事。又聞將欲入滅重起生滅之見。雖蒙授記。但信佛語未見佛心。此則終難取菩提之果。以悟非真悟則修亦非真修。而如來出世本懷畢竟未盡。故多方開示猶屬依他。到此如來極盡神力披露本懷明示法身全體。故

說自壽量無窮。以醫師喻明滅而不滅。欲諸聲聞直須悟此法身常住。是乃可爲真因。故因答涌出此品來也。然顯理已圓。故下但分別功德意在隨順而悟得也。

爾時佛告諸菩薩及一切大眾諸善男子汝等當信解如來誠諦之語復告大眾汝等當信解如來誠諦之語又復告諸大眾汝等當信解如來誠諦之語是時菩薩大眾彌勒爲首合掌白佛言世尊惟願說之我等當信受佛語如是三

自己復言惟願說之我等當信受佛語。

此世尊因前地漏之衆彌勒騰疑啟請故說此品以答之未說之先再三叮嚀當信如來誠諦之語者以壽量之事難信難解所謂諸佛智慧甚深無量今若說之恐聞者視爲荒唐謬悠之談儻生疑不信則返罪戾故苦口告誡而後說也彌勒大眾三白當信受佛語唯願說之請法之心篤切之至也。

爾時世尊知諸菩薩三請不止而告之言汝等

諦聽如來秘密神通之力

此正答衆問言三請不止者此正發揮方便品初如來出定自言諸佛智慧甚深無量其智慧門難解難入之二語前佛自歎而不說因身子三請三止而後說者前因引二乘漸入佛慧將欲開佛知見故身子爲當機也今說壽量乃廣明前意而因彌勒以請者以前三周方便開示已說其智慧門故爲二乘授記然諸得記者其實未悟法身實際故因地

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

漏而說壽量。將爲新記菩薩悟此法身以爲真因必得佛果故因彌勒一生補處大士而請也。觀後分別功德則知悟此本法方爲真悟可以入佛知見也。然佛出世爲大事因緣單爲衆生開示佛之智慧乃法身真體令其悟入是故最初出定卽特告之但標示之而已種種開示直至寶塔品方分明顯示佛之智慧猶假多寶示其同體而已未自親說本分事也今則直示本有壽量所謂八字打開

通身吐露方爲竭盡本懷以此事四十年來久默斯要不務速說卽今開顯未敢遽說猶費三周種種方便而今乃說者斯皆如來秘密神通之力也是知如來出世一番至今法華全經單爲說破諸佛智慧甚深無量其智慧門難解難入二語而已觀者豈易見哉。

一切世間天人及阿修羅皆謂今釋迦牟尼佛出釋氏宮去伽耶城不遠坐於道場得阿耨多羅三藐三菩提然善男子我實成佛已來無量

無邊百千萬億那由他劫

此答一語破盡人天三乘之疑以見迹而不見本故也所謂達本情亡知心體合知本是爲真知見力也

譬如五百千萬億那由他阿僧祇三千大世界界假使有人抹爲微塵過於東方五百千萬億那由他阿僧祇國乃下一塵如是東行盡是微塵諸善男子於意云何是諸世界可得思惟校計知其數不彌勒菩薩等俱白佛言世尊是諸

世界無量無邊非算數所知亦非心力所及一切聲聞辟支佛以無漏智不能思惟知其限數我等住阿惟越致地於是事中亦所不達世尊如是諸世界無量無邊爾時佛告大菩薩衆諸善男子今當分明宣語汝等是諸世界若著微塵及不著者盡以爲塵一座一劫我成佛已來復過於此百千萬億那由他阿僧祇劫

此說壽量長遠難思故以地種塵墨以取世界微塵之數也前因緣周中引釋尊於大通

智勝佛前爲王子時說法華經結一乘之緣
將明遠因以一三千大千世界爲地種磨以
爲墨今以五百千萬億那由他阿僧祇三十
大千世界爲地種盡以爲塵而塵又細於墨
點盡此微塵則地種已不勝其多矣前云乃
過東方千國土乃下一點今則過東方五百
千萬億那由他阿僧祇國乃下一塵則不著
塵之國又不勝其多矣是此微塵之數已非
算數所知心力所及矣則三乘學人與不退

菩薩皆所不達矣。況諸世界著塵不著塵者。
總以爲塵一塵一劫豈可得而思議耶。是知
大通猶約多述而言耳。故方便品歷言身子
三乘及不退諸菩薩滿三千界如稻麻竹葦
之多人合其智力而不知諸佛智慧者義見
於此矣。

自從是來我常在此娑婆世界說法教化亦於餘處百千萬億那由他阿僧祇國導利衆生此言成佛壽量如上塵劫之遠且多也。且云

自從是來常在娑婆世界說法教化。又在他方導利衆生此其所以難信難解故二乘人天聞之無怪其皆驚疑也。此直示常住法身本無生滅依報世界同一寂光所謂有佛無佛性相當住故知諸佛本不涅槃衆生原無死生是爲平等法界實相妙法畢露於此矣。是豈三乘劣解可能信解耶故必開佛知見乃盡知盡見正謂唯佛與佛乃能究竟諸法實相者此也直欲三乘行人知此見此方名解難入也。

悟佛知見耳

諸善男子於是中間我說然燈佛等又復言共入於涅槃如是皆以方便分別

此答伏難之文也上言成佛久遠乃說諸佛智慧甚深無量此言授記涅槃皆是方便乃說其智慧門以方便之權特爲顯實所以難解難入也。

諸善男子若有衆生來至我所我以佛眼觀其信等諸根利鈍隨所應度處處自說名字不同

80 1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

年紀大小亦復現言當入涅槃又以種種方便說微妙法能令衆生發歡喜心

此言法身湛然常住而現身利生應化之跡但隨機有利鈍故說名字不同如華嚴名號品壽命長短如阿僧祇品法有頓漸如四聖諦品皆隨緣之用非本法也

諸善男子如來見諸衆生樂於小法德薄垢重者爲是人說我少出家得阿耨多羅三藐三菩提然我實成佛已來久遠若斯但以方便教化

衆生令入佛道作如是說

此言跡近本久其所施設皆方便耳

諸善男子如來所演經典皆爲度脫衆生或說己身或說他身或示己身或示他身或示己事或示他事諸所言說皆實不虛

此言所說之法或自或他如燈明大通多寶等事皆是一身一智慧示現之事皆是實事所言非虛以衆生智淺故生疑不信起異見耳

所以者何如來如實知見三界之相無有生死
 若退若出亦無在世及滅度者非實非虛非如
 非異不如三界見於三界如斯之事如來明見
 無有錯謬以諸衆生有種種性種種欲種種行
 種種憶想分別故欲令生諸善根以若干因緣
 菩薩言辭種種說法所作佛事未曾麁廢
 此釋皆實不虛之意以顯諸法實相常住也
 如實知見三界之相等者所謂諸法如是相
 性體力本末究竟等也以如來明見三界之

相本無生死出沒生滅虛實如異等相所謂
 一相一味之法離相滅相究竟常寂滅相也
 以三界衆生迷此本法故妄見有生滅差別
 等相以如來明見一際平等無有錯謬所謂
 佛知見也故云不如三界見於三界今爲衆
 生開佛知見直欲知此見此三界之相如是
 而已故前云如是妙法者此也是所謂諸佛
 智慧甚深無量只以衆生根性不同有種種
 性欲憶想分別故應機施設以若干因緣譬

喻種種說法所作者皆佛事也是所謂其智慧門難解難入也。

如是我成佛已來甚大久遠壽命無量阿僧祇劫常住不滅

此結示法身常住不滅也

諸善男子我本行菩薩道所成壽命今猶未盡復倍上數然今非實滅度而便唱言當取滅度如來以是方便教化衆生

此言唱滅以明權也前以塵劫所喻之壽命

乃明法身久違常住不滅此言本行菩薩道時所成未盡壽命復倍上數者是所謂法身向上事也如此而唱滅者方便應機之權跡耳。

所以者何若佛久住於世薄德之人不種善根貧窮下賤貪著五欲入於憶想妄見網中若見如來常在不滅便起憍恣而懷厭怠不能生難遭之想恭敬之心是故如來以方便說

此釋唱滅之所以也若佛久住於世則薄德

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

等人不起難遭之想不生恭敬之心爲是等故所以唱滅耳以權跡示現實在而言滅所以難信

比丘當知諸佛出世難可值遇所以者何諸薄德人過無量百千萬億劫或有見佛或不見者以此事故我作是言諸比丘如來難可得見斯衆生等聞如是語必當生於難遭之想心懷戀慕渴仰於佛便種善根是故如來雖不實滅而言滅度又善男子諸佛如來法皆如是爲度衆

生皆實不虛

此言如來真實不滅而言滅者欲令衆生發難遭想懷戀慕心使種善根所以不實滅而言滅也此權示滅諸佛利生法皆如此總是爲度衆生故權即是實故云皆實不虛譬如良醫智慧聰達明練方藥善治衆病其人多諸子息若十二十乃至百數

此設醫師之喻以喻如來實在言滅以釋爲度衆生之意醫師喻佛醫方喻教妙藥喻理

衆病藥性種種喻對治衆生種種性欲之病
所謂佛說一切法爲治一切心若無一切心
何用一切法諸子至百言三界衆生一十二
十者指由人天而至十類也。

以有事緣遠至餘國諸子於後飲他毒藥藥發
悶亂宛轉於地

此喻佛化緣畢故隱身不現又現他方是爲
舊醫前佛既滅三界衆生親習外道小乘故
如飲他毒藥宛轉於地喻以苦捨苦輪迴六

趣也

是時其父還來歸家諸子飲毒或失本心或不
失者遙見其父皆大歡喜拜跪問訊善安隱歸
我等愚癡誤服毒藥願見救療更賜壽命父見
子等苦惱如是依諸經方求好藥草色香美味
皆悉具足擣篩和合與子令服而作是言此大
良藥色香美味皆悉具足汝等可服速除苦惱
無復衆患

此喻如來觀見三界衆苦所逼故現出世。是

謂新醫。然云其父還來言無二父也。衆生在
迷去佛甚遠故云遙見知名識字故云皆大
歡喜發心造修故云拜跪問訊已知煩惱苦
本生死苦患願求出離故云我等愚癡誤服
毒藥願見救療返妄歸真故云更賜壽命佛
遵諸佛法式應機教化將一乘法分別說三
故云依諸經方求好藥草等萬行具足故云
色香美味諸所說法皆是一相一味之法故
云具足搗篩和合以此權巧方便救度故云

汝等可服斷惑證真故云速除苦惱無復衆
患。

其諸子中不失心者見此良藥色香俱好卽便
服之病盡除愈餘失心者見其父來雖亦歡喜
問訊求索治病然與其藥而不肯服所以者何
毒氣深入失本心故於此好色香藥而謂不美
此喻受化難易也見藥卽服者所謂上根利
智遇卽信受化易也言見父雖喜亦求治
病而不肯服藥者喻二乘人雖親佛法而不

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

肯取菩提也。以習障深厚故云毒氣深入。

父作是念此子可愍爲毒所中心皆顛倒雖見我喜求索救療如是好藥而不肯服我今當設方便令服此藥卽作是言汝等當知我今衰老死時已至是好良藥今留在此汝可取服勿憂不差作是教已復至他國遣使還告汝父已死此喻將唱滅說此經也此子可愍等喻二乘執權不捨不求大乘故云而不肯服良藥留

在喻說此經告父已死喻唱入涅槃實往他

國而言已死喻其實不滅而不現滅度也。

是時諸子聞父背喪心大憂惱而作是念若父在者慈愍我等能見救護今者捨我遠喪他國自惟孤露無復恃怙常懷悲感心遂醒悟乃知此藥色香美味卽取服之毒病皆愈其父聞子悉已得差尋便來歸咸使見之。

此喻受持此經卽得開悟佛知見也。故云尋便來歸咸使見之所謂我處靈鷲山常在而不滅也。此彰法身常住隨機有隱顯耳。

10 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

諸善男子於意云何頗有人能說此良醫虛妄
罪不不也世尊

此審虛妄顯佛語真實總結上喻

佛言我亦如是成佛已來無量無邊百千萬億
那由他阿僧祇劫爲衆生故以方便力言當滅
度亦無有能如法說我虛妄過者

此言佛真法身常住不滅但隨機感權示滅
度故云以方便力等

爾時世尊欲重宣此義而說偈言

自我得佛來所經諸劫數無量百千萬億載阿
僧祇常說法教化無數億衆生令入於佛道爾
來無量劫

此通頌法身常住隨機隱顯也自我得佛八
句頌成佛久遠常住不滅。

爲度衆生故方便現涅槃而實不滅度常住此
說法

此頌滅而不滅以滅乃權見非實滅也。

我常住於此以諸神通力令顛倒衆生雖近而

不見衆見我滅度廣供養舍利咸皆懷戀慕而生渴仰心衆生既信伏質直意柔軟一心欲見佛不自惜身命時我及衆僧俱出靈鷲山我時與衆生常在此不滅以方便力故現有滅不滅此頌釋滅而不滅之意也其實法身常住而言滅者乃以神通力令顛倒衆生雖近而不見將謂我滅耳衆見我滅度下十四句釋不滅之所以若衆因見我滅咸供舍利而起戀慕渴仰之心欲求見佛乃至不惜身命則苦

求之至時則我與衆僧於靈鷲山俱時出現而語衆生言我常在此是謂善權故曰以方便力現滅不滅非真滅也

餘國有衆生恭敬信樂者我復於彼中爲說無上法汝等不聞此但謂我滅度

此頌法身普應隨機隱顯所謂水清月現感應道交原非有心彼此也
我見諸衆生沒在於苦惱故不爲現身令其生渴仰因其心戀慕乃出爲說法

1 2 3 4 5 6 7 8 9 10 1 2 3 4 5 6 7 8 9 10

此頌隱顯隨機之意。機怠則隱。機感則出。是知隱顯在機不在佛也。

神通力如是於阿僧祇劫常在靈鷲山及餘諸住處。

此頌顯法身常住無論此界他方常在不滅之意。

衆生見劫盡大火所燒時我此土安隱天人常充滿園林諸堂閣種種寶莊嚴寶樹多華果衆生所游樂諸天擊天鼓常作衆技樂雨曼陀羅

華散佛及大眾

此頌三災壞劫而此土安隱是法身所居寂光性土及實報莊嚴土也。言佛常在靈山不滅則此娑婆雖經三災壞而不壞。是知此穢土卽是實報莊嚴不待三變爲淨土耳。以衆生垢重無明所見故穢惡充滿。佛眼觀之則真空冥寂微妙莊嚴故前三變淨土特示衆生佛知見耳。園林等皆實報莊嚴之事卽此娑婆便是實報豈常情所見乎。

我淨土不毀而衆見燒盡憂怖諸苦惱如是悉充滿。

此頌淨土其實不毀而衆生見燒盡者乃別業妄見惡業所召耳。

是諸罪衆生以惡業因緣過阿僧祇劫不聞三寶名諸有修功德柔和質直者則皆見我身在此而說法或時爲此衆說佛壽無量久乃見佛者爲說佛難值。

此十二句頌淨穢隨機隱顯非佛隨感而應。

無定相也。

我智力如是慧光照無量壽命無數劫久修業所得汝等有智者勿於此生疑當斷令永盡佛語實不虛。

此頌總結法身常住本無隱顯勸衆當信也。梵語毘盧遮那此云光明遍照以法身智慧光照無量故壽亦無量。

如醫善方便爲治狂子故實在而言死無能說虛妄。

此頌喻也

我亦爲世父救諸苦患者爲凡夫顛倒實在而言滅以常見我故而生憍恣心放逸著五欲墮於惡道中

此頌法合以凡夫顛倒故實在言滅所以示滅者惟恐常見我而生憍恣爲是等故乃示滅耳是知佛若隱若顯皆爲度生無虛日也我常知衆生行道不行道隨所應可度爲說種種法每自作是意以何令衆生得入無上慧速

成就佛身

此頌施權之所以也所謂曲隨機宜方便說法總之無非爲令衆生速得成就佛慧耳妙法蓮華經分別功德品第十七

此品來意由聞佛說壽量長遠已悟法身常住兼見三變淨土之境已了三界唯心此乃妙悟爲深信解以爲真因可契如來常住真果以此持經方爲妙行以法身常住世間淨土不離當處故勉能作如是觀者是爲深信

解相矣故此分別功德不可思議到此生滅
情亡淨穢見泯妙悟已極方爲真持經者故
此品來也天台判五種法師屬觀行位是知
持經意在妙悟非文字也故能超越一切有
爲功德。

爾時大會聞佛說壽命劫數長遠如是無量無
邊阿僧祇衆生得大饒益

此經家叙致法會大衆聞說壽量得大饒益
也

於時世尊告彌勒菩薩摩訶薩阿逸多我說是
如來壽命長遠時六百八十萬億那由他恒河
沙衆生得無生法忍復有千倍菩薩摩訶薩得
聞持陀羅尼門復有一世界微塵數菩薩摩訶
薩得樂說無礙辯才復有一世界微塵數菩薩
摩訶薩得百千萬億無量旋陀羅尼復有三千
大千世界微塵數菩薩摩訶薩能轉不退法輪
復有二千中國土微塵數菩薩摩訶薩能轉清
淨法輪復有小千國土微塵數菩薩摩訶薩八

生當得阿耨多羅三藐三菩提復有四四天下
微塵數菩薩摩訶薩四生當得阿耨多羅三藐
三菩提復有三四天下微塵數菩薩摩訶薩三
生當得阿耨多羅三藐三菩提復有二四天下
微塵數菩薩摩訶薩二生當得阿耨多羅三藐
三菩提復有一四天下微塵數菩薩摩訶薩一
生當得阿耨多羅三藐三菩提

此如來正示聞說壽量得大饒益之人也而
所叙得益之人義有淺深次第卽分別悟入

淺深得果因之有先後耳無生忍者乃由前
修安樂行初住忍辱地今聞壽量法身常住
了無生滅得忍行成就以無生法忍可於心
故如是恒沙衆生得無生忍也楞嚴經云由
三漸次得無生忍義當觀行成就卽頓悟無
生以入信位今經因修四安樂行以忍爲主
初由生忍以至無生如觀音耳根動靜不生
聞所聞盡是亦由觀照了悟無生義當信位
也以信屬外凡故標舉衆生聞持陀羅尼者

陀羅尼此云總持謂總一切法持無量義今

云聞持者因聞壽量了悟法身安住實相持

而不失義當十住住持真理以圓悟圓持不

歷次第故云總持謂圓悟法身總該十位圓

成一心故曰聞持陀羅尼得樂說無礙辯才者義當十行以十住圓悟實相真空但住空理今從空出假涉俗利生故爲十行然樂說無礙正說法利生之行以一行圓成一切行故得無量旋陀羅尼者旋猶漩水之急流漩

渡處也此義當十廻向由前空假二行攝歸中道回向三處圓成一心以念念空假卽念念中道如水之急流有漩謂心心攝入中道第一義諦也能轉不退法輪者義當初地謂一登地得大歡喜永不退轉故能轉清淨法輪者義當二地以離一分無明破戒之垢故云清淨皆云能轉法輪者以隨悟隨行故此經義悟卽是行故八生已下歷次乃至一生當得菩提者由三地歷次以至十地一生補

法華述義

卷五

處當成佛果也。其所約位由淺至深故衆生極多而菩薩由多漸少。初從世界微塵之數減至一四天下微塵數者以理愈深位彌高故其人漸少。此見根之利鈍不一也。問曰此經純談實相直悟法身頓登佛果不說行位漸次階級今乃約位釋之無乃謬解佛意乎。答曰理固然也。華嚴乃一乘圓頓法門。其所說四十二位皆以信爲根本故曰初發心時卽得菩提是以法界一念因心卽該果海故

曰因該果海果徹因源是始終地位總在因心此乃無漸次之漸次也。楞嚴所說位次乃曰由三增進成就五十五位是依四根本戒圓滿一心攝入三觀故從三漸次悟無生忍是則五十五位皆依一心三觀但就斷惑淺深以約位次雖列諸位總在一心此亦無漸次之漸次也。今經依四安樂行以盡持經之妙由聞壽量妙悟法身正與楞嚴由三漸次悟無生忍義同。但彼經所宗一心三觀此經

所宗實相爲衆生正因佛性意借緣因悟入卽名爲佛故不說修斷行位漸次只以悟佛地知見爲本今旣由四行妙悟法身徑登佛地乃今較量功德猶約諸位次釋之者以約緣因佛性以緣有淺深故悟有近遠但以悟而言不說斷無明以分位也此經純談實相所謂無明實性卽佛性故無煩惱可斷是約位以驗悟非實有地位可名目也若以階級爲難過矣古德云聖諦亦不立何階級之有此

實圓頓之旨也

復有八世界微塵數衆生皆發阿耨多羅三藐
三菩提心

此單言發心衆生乃未入道者也。

佛說是諸菩薩摩訶薩得大法利時於虛空中
雨曼陀羅華摩訶曼陀羅華以散無量百千萬
億寶樹下師子座上諸佛并散七寶塔中師子
座下釋迦牟尼佛及久滅度多寶如來亦散一
切諸大菩薩及四部衆又雨細末旃檀沉水香

等於虛空中天鼓自鳴妙聲深遠又雨千種天
衣垂諸瓔珞真珠瓔珞摩尼珠瓔珞如意珠瓔
珞徧於九方衆寶香爐燒無價香自然周至供
養大會一一佛上有諸菩薩執持幡蓋次第而
上至于梵天是諸菩薩以妙音聲歌無量頌讚
歎諸佛

此空瑞證法也壽量如空本具萬德故空中
雨華以法身體同故供釋迦多寶及諸大眾
也又雨細末旃檀沉水香等者言法身妙空

所有神通妙行無不充足也上至梵天顯法
身遍至色邊際也空中出音讚佛者言法性
妙空法音充滿歎佛功德不可思議也

爾時彌勒菩薩從座而起偏袒右肩合掌向佛
而說偈言

佛說希有法昔所未曾聞世尊有大力壽命不
可量無數諸佛子聞世尊分別說得法利者歎
喜充徧身或住不退地或得陀羅尼或無礙樂
說萬億旋總持或有大千界微塵數菩薩各各

皆能轉不退之法輪復有中千界微塵數菩薩各各皆能轉清淨之法輪復有小千界微塵數菩薩餘各八生在當得成佛道復有四三二如此四天下微塵諸菩薩隨數生成佛或一四天下微塵數菩薩餘有一生在當成一切智如是等衆生聞佛壽長遠得無量無漏清淨之果報復有八世界微塵數衆生聞佛說壽命皆發無上心

此彌勒偈讚顯此法利爲當來成佛真因也

佛說希有法下八句叙讚法利也。或住不退地下十二句頌初入道以至登地已上也。復有小千界下十二句頌三地以至十一地也。如是等衆生下四句頌因聞壽量得實果報之如上也。復有八世界下頌發心衆生未入道者。

世尊說無量不可思議法多有所饒益如虛空無邊兩天曼陀羅摩訶曼陀羅釋梵如恒沙無數佛土來雨旃檀沉水繢紛而亂墜如鳥飛空

下供散於諸佛天鼓虛空中自然出妙聲天衣
千萬種旋轉而來下衆寶妙香鑪燒無價之香
自然悉周徧供養諸世尊其大菩薩衆執七寶
幢懸勝旛亦以千萬偈歌詠諸如來
旛蓋高妙萬億種次第至梵天一一諸佛前寶
此頌瑞應也以法身如空體具萬德故空中
種種瑞應以供諸佛也

如是種種事昔所未曾有聞佛壽無量一切皆歡喜佛名聞十方廣饒益衆生一切具善根以

助無上心

此結頗所顯也。言如是種種瑞事，昔所未有者，蓋爲聞說壽量長遠，故法空妙應助發妙心，現此諸瑞也。前現瑞爲助顯第一義，今現瑞爲助發無上心。

爾時佛告彌勒菩薩摩訶薩阿逸多其有衆生聞佛壽命長遠如是乃至能生一念信解所得功德無有限量

此言因聞壽量較量後益也。一念信解功德

無量者以壽量如空。一念信解卽入法信妙空功德豈有限量哉。

若有善男子善女人爲阿耨多羅三藐三菩提故於八十萬億那由他刦行五波羅蜜檀波羅蜜尸羅波羅蜜羼提波羅密毘黎耶波羅蜜禪波羅蜜除般若波羅蜜以是功德比前功德百分千分百千萬億分不及其一乃至筭數譬喻所不能知若善男子善女人有如是功德於阿耨多羅三藐三菩提退者無有是處

此言信解壽量卽入佛慧故多刦行五波羅蜜以除般若皆屬有爲事行淨名云無慧方便縛所以多刦功行不比佛慧功德也已入法位故永不退入生死也

爾時世尊欲重宣此義而說偈言

若人求佛慧於八十萬億那由他刦數行五波羅蜜於是諸刦中布施供養佛及緣覺弟子並諸菩薩衆珍異之飲食上服與臥具旃檀立精舍以園林莊嚴如是等布施種種皆微妙盡此

10 1 2 3 4 5 6 7 8 9 90

1 2 3 4 5 6 7 8 9 100

諸劫數以廻向佛道若復持禁戒清淨無缺漏求於無上道諸佛之所歎若復行忍辱住於調柔地設衆惡來加其心不傾動諸有得法者懷於增上慢爲此所輕惱如是亦能忍若復勤精進志念常堅固於無量億劫一心不懈息又於無數劫住於空閒處若坐若經行除睡常攝心以是因緣故能生諸禪定八千億萬劫安住心不亂持此一心福願求無上道我得一切智盡諸禪定際是大於百千萬億劫數中行此諸功德如上之所說有善男女等聞我說壽命乃至一念信其福過於彼若人悉無有一切諸疑悔深心須臾信其福爲如此

若人求佛慧下四句總頌標五度於是諸劫中下十二句別頌施度若復持禁戒下四句頌戒度若復行忍辱下八句頌忍度若復勤精進下四句頌進度又於無數劫下十二句頌禪度是人於百千下四句頌結五度總諸功德有善男女等八句頌較功德謂一念信

解壽量其福過彼多劫行五度者以斷諸疑
悔安住實智絕諸思量外慕故功德勝彼不
可思議也

薩下十六句言無量劫行道宿種深厚故聞
說壽命必能信受故頂受此經願於未來長
壽度生如今世尊說無畏法我等將來成佛
說壽亦如是也由必信不疑故願力堅固如
此也

若有深心者清淨而質直多聞能總持隨義解佛語如是之人等於此無有疑

此頌必信乃上根利智之人也。深心則深達實相清淨則戒根具足。質直則志念堅固。多

聞則承事多佛總持則通達法藏隨義而解則妙契離言如此之人乃能必信所謂此經不入餘衆生手也。

又阿逸多若有聞佛壽命長遠解其言趣是人所得功德無有限量能起如來無上之慧

此言壽量義趣也壽量歸趣方法身極則故所得功德無有限量善入佛慧故能起如來無上之慧起猶開發也

自書若教人書若以華香瓔珞幢旛繒蓋香油蘇燈供養經卷是人功德無量無邊能生一切種智

此顯聞持利益也何況者比上之辭言但知義趣則起佛智慧何況廣聞而轉教他人六

種受持則功德無邊自然生一切種智矣

阿逸多若善男子善女人聞我說壽命長遠深心信解則爲見佛常在耆闍崛山共大菩薩諸聲聞衆圍繞說法又見此娑婆世界其地琉璃

100 1 2 3 4 5 6 7 8 9 90

1 2 3 4 5 6 7 8 9 100

1 2 3 4 5 6 7 8 9

坦然平正闇浮檀金以界八道寶樹行列諸臺
樓觀皆悉寶成其菩薩衆咸處其中若有能如
是觀者當知是爲深信解相

此言深信解相也言能深心信解法身常住
則靈山一會儼然常存婆婆穢土宛然華藏。
能如是觀是爲深信解相以一念頓超十地
卽得成佛故云深信解也前方便品卽許身
子以信得入及四大弟子領悟乃品標信解
之名雖蒙授記信解未深但以信佛語故每

誠曰如來所說言不虛妄然未信佛心也及
現寶塔雖見多寶不滅三變淨土猶然不知
釋尊法身常住穢土本淨以自心未有開悟
也及說持經四安樂行依之精研地涌現前
乃自心發悟故如來自說壽量長遠以顯法
身常住不滅到此乃見法身永無生滅淨穢
一如方信佛心故結指觀心曰若能如是觀
者是爲深信解相故愚前云信解標品直至
現寶塔品乃由信而知解從提婆品至此由

行而悟故爲深信解以徹悟法身極則也。天台通以三觀釋經義宗於此。以悟法華三昧親見靈山一會現存是自證深信解相非特爾也。但學人智淺心麤不能融入妙觀故以爲繁耳。豈知古人之妙悟哉。

又復如來滅後若聞是經而不毀訾起隨喜心當知以爲深信解相何況讀誦受持之者斯人則爲頂戴如來

上明壽量一品之利此明全經之利也。言但

能隨喜此經則已爲深信解相矣。何況讀誦受持豈不爲頂戴如來耶。以此經是如來法身全體故。

阿逸多是善男子善女人不須爲我復起塔寺及作僧坊以四事供養衆僧所以者何是善男子善女人受持讀誦是經典者爲已起塔造立僧坊供養衆僧則爲以佛舍利起七寶塔高廣漸小至於梵天懸諸旛蓋及衆寶鈴華香瓔珞末香塗香燒香衆鼓技樂簫笛箜篌種種舞戲

1 2 3 4 5 6 7 8 9 90

1 2 3 4 5 6 7 8 9 100

以妙音聲歌舞讚頌則爲於無量千萬億劫作
是供養已

此言若能受持讀誦此經則爲供佛及僧。以
此經乃一體三寶。所以持經卽供三寶也。

阿逸多若我滅後聞是經典有能受持若自書
若教人書則爲起立僧坊以赤栴檀作諸殿堂
三十有二高八多羅樹高廣嚴好百千比丘於
其中止園林浴池經行禪窟衣服飲食床褥湯
藥一切樂具充滿其中如是僧坊堂閣若干百

千萬億其數無量以此現前供養於我及比丘
僧

此重舉持經則爲已供三寶者以顯法供養
最故也。

是故我說如來滅後若有受持讀誦爲他人說
若自書若教人書供養經卷不須復起塔寺及
造僧坊供養衆僧

此結顯法供最勝也。不須塔寺等以顯理行
最勝故。

況復有人能持是經兼行布施持戒忍辱精進
一心智慧其德最勝無量無邊譬如虛空東西
南北四維上下無量無邊是人功德亦復如是
無量無邊疾至一切種智

若人讀誦受持是經爲他人說若自書若教人
書復能起塔及造僧坊供養讚歎聲聞衆僧亦
以百千萬億讚歎之法讚歎菩薩功德

上言但能持經不須復造塔寺僧坊等恐廢於行也故此又言既能持經又能兼行事行起造塔寺僧坊又能讚歎三乘之人如此理事雙修豈不更爲殊勝

又爲他人種種因緣隨義解說此法華經復能
清淨持戒與柔和者而共同止忍辱無瞋志念
堅固常貴坐禪得諸深定精進勇猛攝諸善法
利根智慧善答問難阿逸多若我滅後諸善男
子善女人受持讀誦是經典者復有如是諸善

功德當知是人已趣道場近阿耨多羅三藐三

菩提坐道樹下阿逸多是善男子善女人若坐若立若行處此中便應起塔一切天人皆應供養如佛之塔

此言既能持經又能解說又能備修衆多理行豈不爲已趣道場得近菩提坐道樹下將成正覺哉此釋上疾得一切種智之義也有人如此妙行則四威儀處皆應起塔供養以此人已具佛心佛行去佛不遠固當供養也

此總結深信解相之功德也。

爾時世尊欲重宣此義而說偈言

若我滅度後能奉持此經斯人福無量如上之所說是則爲具足一切諸供養以舍利起塔七寶而莊嚴表刹甚高廣漸小至梵天寶鈴千萬億風動出妙音又於無量劫而供養此塔華香諸瓔珞天衣衆技樂然香油蘇燈周匝常照明惡世法末時能持是經者則爲已如上具足諸供養若能持此經則如佛現在以牛頭旃檀起

10 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

僧坊供養堂有三十二高八多羅樹上饌妙衣
服牀臥皆具足百千衆住處園林諸浴池經行
及禪窟種種皆嚴好若有信解心受持讀誦書
若復教人書及供養經卷散華香末香以須曼
蒼荀阿提目多伽熏油當然之如是供養者得
無量功德如虛空無邊其福亦如是況復持此
經兼布施持戒忍辱樂禪定不瞋不惡口恭敬
於塔廟謙下諸比丘遠離自高心常思惟智慧
有問難不瞋隨順爲解說若能行是行功德不

可量若見此法師成就如是德應以天華散天
衣覆其身頭面接足體生心如佛想又應作是
念不久詣道樹得無漏無爲廣利諸人天其所
住止處經行若坐臥乃至說一偈是中應起塔
莊嚴令妙好種種以供養佛子住此地則是佛
受用常在於其中經行及坐卧

若我滅度後四句總頌持經勝福是則爲具
足下十八句頌則爲供佛若能持此經下十
二句頌則爲供僧若有信解心下十二句頌

10 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

單持經供養之福。況復持此經下四句頌。兼行六度恭敬塔廟下六句頌。備具衆善。若能行是行三十二句頌。結持經之人。以敬持經之人。如佛則凡於所止坐卧之處。則當莊嚴如供養佛。以此佛子如佛則受用亦如佛也。須曼那。又云蘇摩那。此云適意。薺蕎亦云瞻博迦。此云黃華。阿提目多伽。此云無龍舐。此三華最香。熏麻取油。然燈供佛。

妙法蓮華經通義卷第五 終

南嶽門人方玉校對

太倉信士曹時保施銀十三兩二錢三分刻第五卷經計字二萬五千四百六十字資薦

先考太學生申錫府君 先慈顧氏
超登蓮界者

80

1 2 3 4 5 6 7 8 9

90

1 2 3 4 5 6 7 8 9

90

1 2 3 4 5 6 7 8 9

90

1 2 3 4 5 6 7 8 9

90

1 2 3 4 5 6 7 8 9

90

1 2 3 4 5 6 7 8 9

90

1 2 3 4 5 6 7 8 9

90

1 2 3 4 5 6 7 8 9

90

法華經疏卷第五
大藏書十曹部君藏卷之二
憲迦此云黃華阿提目多伽此子

三華最香熏麻取油南縣門人丈王述撰

妙法蓮華經疏卷第五

廿九

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9